



Selasa, 07 Maret 2023

**Ogen: Hosea 10: 9-15**



**Ielis-Elis Dibata**



“Kejar Daku Kau Kutangkap”, enda sada judul film komedi si pernah lit i bas tahun 1980en. Film enda nuriken kerna uga sepasang ndehara ras perbulangen i bas perjabun, karakter si pelain-lain erbahanca lit saja turah konflik bas jabu e. Tapi erkiteken lit kekelengen maka amin gia megati salah paham ras sigeluten, lit lalap dalanna ersada ngulih. Kekelengen e mahanca ku ja pa pe perlawes temanta, sidarami ia rusur janah adi nggo ndauhsa ia erdalan kiam kita gelah ngayakisa. Maka lalap lit kiniersadan.

Kita enda igelari pe selaku “mempelai wanita” sikerajangen Dibata. Perukurenta megati ndauh sirang ras perukurenNa. Kemanusiaannta megati nundalken Tuhan si setia, siakap ngasup kita arah gegeh, kolega ras pemeteha jine ndalani geluhta. Bangsa Tuhan kalak Israel, suku Efraim si desken anak lembu terajar, genduari enggo jadi sada suku bangsa Tuhan si pernogan. Lanai megiken sora Tuhan, janah erbahan kejahatan, perguak ras meganjang ukurna. Erkiteken ceda ukur Tuhan bangsaNa nggo ndauh lalar, e maka nina Tuhan, “ku elis-elis me bangsa perdosa e dingen Kuukum Ia.” Kai si isuanken kalak e ka iperanina. Adi kalak nuan arah pusuh perukuren si erdosa iperanina me buah dosa si maba kematen. Tuhan la ateNa mate sia-sia bangsaNa. E maka amin gia ielis-elis Tuhan kita, i bas pergara pernembah ateNa, tapi si tuhuna belinen nge perkuah ateNa.

Tuhan ngayak-ngayak kita arah kataNa i bas pusuhta. Pusuhta e lalap ngerana di kune lit si la payo silakoken, la kita tenang, megogo ras ceda rusur ukurta, em tanda-tanda lit dosa si man akunken ras si man pekenan i bas kita. Dikune e si jadi genduari man bata, ula mbiar. Ula sirangi Dibata. Ulih pertobatan ndauh organ asangkan kerelanta ngaloken ukumen

☞ Apai nge padian? Ielis-elis Tuhan ntah ielis setan?